



Švicarska.



PRAGG

PROAKTIVNI GRAĐANI I GRAĐANKE

**PODRŠKA CIVILNOM DRUŠTVU U BOSNI I HERCEGOVINI  
PROJEKAT PRAGG  
- PROAKTIVNI GRAĐANI I GRAĐANKE -**

**JAVNI POZIV  
za dostavljanje aplikacija za zagovaračke kampanje ka višim nivoima  
vlasti u BiH**

- Uputstvo za aplikante -

Oktobar 2024.

<b>SADRŽAJ</b>
----------------

<b>POPIS SKRAĆENICA.....</b>	<b>2</b>
<b>POZADINA.....</b>	<b>3</b>
<b>JAVNI POZIV ZA DOSTAVLJANJE APLIKACIJA.....</b>	<b>5</b>
<b>CILJEVI JAVNOG POZIVA .....</b>	<b>6</b>
<b>OBLASTI JAVNOG POZIVA .....</b>	<b>6</b>
<b>SMJERNICE ZA KREIRANJE APLIKACIJA .....</b>	<b>11</b>
<b>USLOVI I PROCEDURE ZA APLICIRANJE .....</b>	<b>13</b>
<b>VREMENSKI OKVIR ZA APLICIRANJE, VREDNOVANJE I ODOBRAVANJE APLIKACIJA .....</b>	<b>15</b>
<b>KRITERIJI ZA VREDNOVANJE APLIKACIJA .....</b>	<b>16</b>
<b>TROŠKOVI PROJEKTA I BUDŽET .....</b>	<b>17</b>
<b>IZJAVA O PARTNERSTVU.....</b>	<b>19</b>

<b>POPIS SKRAĆENICA</b>
-------------------------

<i>BiH –</i>	<i>Bosna i Hercegovina</i>
<i>FBiH –</i>	<i>Federacija Bosne i Hercegovine</i>
<i>RS –</i>	<i>Republika Srpska</i>
<i>EU –</i>	<i>Evropska unija</i>
<i>OSI –</i>	<i>Osobe sa invaliditetom</i>
<i>OCD –</i>	<i>Organizacije civilnog društva</i>
<i>SDC –</i>	<i>Švicarska agencija za razvoj i saradnju</i>
<i>PRAGG –</i>	<i>Proaktivni građani i građanke</i>
<i>CCI –</i>	<i>Centri civilnih inicijativa</i>
<i>UNFPA -</i>	<i>Populacijski fond Ujedinjenih nacija</i>

***Izrazi koji su radi preglednosti dati u jednom gramatičkom rodu u dokumentu, bez diskriminacije se odnose jednako na osobe svih rodova.***

## POZADINA

Projekat PRAGG - Proaktivni građani i građanke želi doprinijeti aktivnijem učešću građana i građanki, naročito socijalno isključenih, u zagovaranju i kreiranju javnih politika kroz angažman u udruženjima i fondacijama, odnosno organizacijama civilnog društva (OCD). Istovremeno, PRAGG želi podržati OCD da kroz učešće u demokratskim procesima predstavljaju glas građana i građanki i zahtijevaju reforme, te tako daju doprinos društvenim promjenama u Bosni i Hercegovini (BiH).

Cilj projekta PRAGG je ojačati uticaj građana na donošenje i provođenje/implementaciju javnih politika kroz njihovu aktivnu mobilizaciju u OCD koje imaju kapacitet da daju stvaran doprinos demokratskim reformama i društvenim promjenama u BiH.

Pristup implementaciji PRAGG projekta fokusiran je na više međusobno povezanih pravaca djelovanja, usmjerenih ka sljedećim rezultatima:

- Rezultat 1: OCD su intenzivirale saradnju sa građanima, posebno sa ženama, mladima i društveno isključenim grupama, kako bi artikulisale njihove najhitnije probleme i zahtijevali od vlasti na svim nivoima vlasti da ih počnu rješavati.
- Rezultat 2: OCD učestvuju u formalnim mehanizmima konsultacija kako bi uticali na javne politike i donošenje odluka, kao i u kampanjama za veći odgovor od strane vlasti.
- Rezultat 3: OCD uspostavljaju saveze i strateški i profesionalno rade zajedno na zahtijevanju reformi i odgovornosti od relevantnih vlasti kao odgovor na hitne probleme građana.
- Rezultat 4: Relevantne vlasti i OCD aktivno sarađuju kako bi poboljšali okruženje za razvoj civilnog društva.

Do sada, projekat PRAGG je započeo aktivnosti u 29 ciljnih lokalnih zajednica širom BiH (u daljem tekstu ciljne lokalne zajednice) i to: Bihać, Bijeljina, Brčko, Breza, Cazin, Čapljina, Doboj, Gacko, Gračanica, Gradačac, Gradiška, Ilijaš, Jablanica, Laktaši, Ljubuški, Maglaj, Modriča, Mostar, Nevesinje, Odžak, Prijedor, Prnjavor, Sanski Most, Srbac, Teslić, Tešanj, Trebinje, Zenica i Žepče te istovremeno, na direktan ili indirektan način, inicirao saradnju sa većim brojem OCD-a<sup>1</sup>.

PRAGG projekat podržan je od Vlade Švicarske, a provodi ga konzorcij koji čine HELVETAS Swiss Intercooperation i NIRAS u Bosni i Hercegovini, u partnerstvu sa lokalnim organizacijama civilnog društva - Centrima civilnih inicijativa (CCI) i Institutom za razvoj mladih KULT.

**HELVETAS Swiss Intercooperation** se zalaže za pravedan svijet u kojem ljudi odlučuju o toku svog života u dostojanstvu i sigurnosti, koristeći prirodne resurse na održiv način. HELVETAS je regionalna organizacija za razvoj sa sjedištem u Švicarskoj, koja ima pridružene organizacije u Njemačkoj i Sjedinjenim Američkim Državama. HELVETAS podržava siromašne i ugrožene ljude u skoro 40 zemalja u razvoju i tranziciji u Africi, Aziji, Latinskoj Americi i Evropi.

<sup>1</sup> "ForTe" Tešanj; "SEHARA" Tešanj; "Invalidi rada općine Tešanj"; "Savez za sport i rekreaciju invalida Tešanj"; "Udruženje žena sa invaliditetom - Impuls" Bijeljina; "Omladinska organizacija Vizija mladih" Bijeljina; Fondacija "Lara" Bijeljina; "Udruženje žena - Žena Janja" Bijeljina; "Udruženje žena - Hercegovka Nevesinje"; "Lovačko udruženje Srndać Nevesinje"; "Udruženje za djecu i omladinu sa posebnim potrebama - Nove nade" Nevesinje; "Udruženje multiple skleroze Istočne Hercegovine" Nevesinje; "KULT" Gradačac; "Udruženje mladih - FUTURA" Gradačac; "Vijeće mladih općine Gradačac"; „Asocijacija srednjoškolaca u BiH“ Gradačac; UG Osmijeh žene, Laktaši; "Slatina", Laktaši; "Amatersko pozorište - Daske", Laktaši; „New Hope“, Žepče; „Kreativci“ Zenica; „ReAktiv“; Zenica; „EkoForum“ Zenica; „Forum za podršku mladih“ Prijedor, KUD „Osman Džafić“ Prijedor, „Udruženje mladih Babića - Sijedi Krš“, Gračanica, Udruženje za zaštitu potrošača „DON“ Prijedor, Udruženje za razvoj, unapređenje i podršku zajednice Teslić, Udruženje distrofičara Teslić, Udruženje paraplegičara opštine Teslić, Udruženje slijepih i slabovidnih Teslić, Udruženje paraplegičara i oboljelih od dječije paralize Zenica, UG „Roditelji za roditelje“ Jablanica, UG „Dignitet“ Mostar, Udruženje „Ekosistem i JA“ Modriča

**NIRAS** je jedna od najvećih evropskih konsultantskih firmi za razvoj. Kroz više od 7.000 aktuelnih projekata, NIRAS daje veliki doprinos ostvarenju ciljeva održivog razvoja. Lokalno prisustvo je ključ uspjeha jer su posvećeni izgradnji dugoročnih partnerstava i sposobnosti.

**Centri civilnih inicijativa (CCI)** je bosanskohercegovačka, nevladina, nestranačka organizacija koja podstiče i promovise aktivno učešće građana u društvenim procesima i jača kapacitete organizacija i pojedinaca kako bi radili na rješavanju problema u zajednicama širom Bosne i Hercegovine.

**Institut za razvoj mladih KULT** je profesionalno udruženje koje se bavi uključivanjem građana/ki u procese donošenja odluka u društvu, razvija i zagovara pravna i druga strateška rješenja, te gradi i jača kapacitete udruženja i vlasti u BiH i regiji, za uspješnu i održivu politiku prema mladima.

## JAVNI POZIV ZA DOSTAVLJANJE APLIKACIJA

Projekat PRAGG – Proaktivni građani i građanke poziva zainteresovana udruženja i fondacije u BiH, da podnesu projektne prijedloge kojim će zagovarati rješavanje konkretnih problema građana ka višim nivoima vlasti u BiH (kantonalni, entitetski i državni).

Kroz javni poziv biće podržani prijedlozi projekata u čijem fokusu su zagovaračke aktivnosti u tri tematske oblasti:

- 1) Unapređenje prava i položaja žena;
- 2) Unapređenje prava i položaja marginaliziranih grupa (osobe sa invaliditetom, djeca, djeca sa poteškoćama u razvoju, starije osobe, pripadnici romske populacije i dr);
- 3) Unapređenje prava i položaja mladih.

Ukupna vrijednost planiranih sredstava za dodjelu kroz ovaj javni poziv iznosi 250.000 BAM. Vrijednost pojedinačnog granta ne smije prelaziti 50.000 BAM.

Vremensko trajanje granta može se kretati u rasponu od minimalno 12 do maksimalno 18 mjeseci.

Za sve zainteresovane aplikante, biće organizovana prezentacija javnog poziva u cilju detaljnijeg predstavljanja istog. Prezentacija će biti organizovana uživo u Sarajevu i Banja Luci, a za zainteresovane predstavnike OCD koji ne budu u prilici prisustvovati prezentaciji uživo, biće organizovan i on-line format prezentacije (putem Teams platforme).

Prezentacija Javnog poziva će biti organizovana po sljedećem rasporedu:

- Prezentacija Javnog poziva, Sarajevo, 16.10.2024. godine u 12:00. sati;
- Prezentacija Javnog poziva, Banja Luka, 17.10.2024. godine u 12:00 sati;
- On-line prezentacija Javnog poziva, 18.10.2024. godine u 12:00 sati.

Učešće na prezentaciji javnog poziva obavezno je najaviti putem e-mail adrese [grantovi@pragg.ba](mailto:grantovi@pragg.ba), najkasnije do 14.10.2024. godine (uz navođenje mjesta održavanja prezentacije i vrste prezentacije kojoj prisustvujete, uživo ili on-line).

Nakon iskazivanja interesa za prisustvo prezentaciji javnog poziva, svi zainteresovani aplikanti putem e-maila dobiće informaciju o lokaciji održavanja prezentacija u Sarajevu i Banja Luci, odnosno link za on-line prezentaciju.

Sva pitanja koja se tiču ovog javnog poziva dostavljaju se isključivo putem e-mail adrese: [grantovi@pragg.ba](mailto:grantovi@pragg.ba) najkasnije 21.10.2024. godine, do 16:00 sati. Odgovori na zaprimljena pitanja, kao i pitanja postavljena tokom organizovanih prezentacija biće objavljena na zvaničnoj internet stranici projekta [www.pragg.ba](http://www.pragg.ba) najkasnije do 23.10.2024. godine.

Javni poziv za dostavljanje aplikacija je otvoren od dana objavljivanja do 01.11. 2024. godine u 16:00 sati. Od aplikanta se traži da do navedenog roka dostave kompletnu aplikacionu dokumentaciju u elektronskoj formi na e-mail adresu: [grantovi@pragg.ba](mailto:grantovi@pragg.ba)

Obrazac aplikacije, te detaljno Uputstvo za aplikante, dostupni su na web stranici projekta PRAGG – [www.pragg.ba](http://www.pragg.ba).

## CILJEVI JAVNOG POZIVA

Cilj javnog poziva je podržati OCD iz različitih ciljnih lokalnih zajednica projekta PRAGG<sup>2</sup> kako bi radili na rješavanju problema građana i učestvovali u procesima donošenja odluka i zagovaranju za rješenja konkretnih problema, ka višim nivoima vlasti u BiH (kantonalni, entitetski, državni), obezbjeđujući im priliku da steknu neophodna znanja, kompetencije i vještine kako bi u tome i uspjeli.

Proces provođenja zagovaračkih kampanja koje su u fokusu javnog poziva podrazumijeva uspostavu (strateških) partnerstava među OCD uključenim u rješavanje konkretnog problema. Pomenuta partnerstva trebaju uspostaviti tematska čvorišta kampanja (tzv. tematske HUB-ove), biti otvorena i uključiti zainteresovane građane, druge OCD, predstavnike akademske zajednice, medija i sl. odnosno sve koji žele i mogu dati doprinos rješavanju problema koji se adresira zagovaračkom kampanjom. Primarna uloga tematskog HUB-a jeste da građanima i drugim zainteresovanim akterima osigura nesmetan pristup informacijama relevantnim za problem kojim se bavi kampanja. Također, ukoliko spomenuti akteri imaju potrebu i spremnost, mogu se obratiti OCD koje čine partnerstvo i koje se bave određenom temom kako bi dali svoj doprinos rješavanju problema (na način da im se omogući da dođu uživo u prostorije organizacije ili se obrate putem društvenih mreža i dr). Tematsko čvorište ili HUB kao specifičan resurs zagovaračkih kampanja treba biti otvoren za građane tokom cijelog trajanja zagovaračke kampanje.

Kako bi se stvorio prostor za sinergiju s drugim akterima civilnog društva u BiH, svim učesnicima zagovaračkih kampanja, projekat PRAGG će omogućiti uvezivanja sa svim OCD uključenim u projekat (npr. kroz organizaciju godišnjih skupština civilnog društva i sl.), te pružiti podršku kroz izgradnju kapaciteta kako bi one osnažile svoje perspektive da budu pokretači društvenih promjena i glas građana u oblastima u kojima djeluju.

## OBLASTI JAVNOG POZIVA

Tematske oblasti za koje će biti podržane aplikacije kroz predmetni javni poziv su:

1. Unapređenje prava i položaja žena;
2. Unapređenje prava i položaja marginaliziranih grupa (osobe sa invaliditetom, djeca, djeca sa poteškoćama u razvoju, starije osobe, pripadnici romske populacije i dr.);
3. Unapređenje prava i položaja mladih.

### I - Prava i položaj žena u BiH

Bosna i Hercegovina je tradicionalno društvo u kojem se žene svaki dan bore za bolji položaj u društvu. Ustaljeni stereotipi o ulozi žene, niže plate i duži periodi nezaposlenosti samo su neki od problema s kojima se suočavaju žene u BiH. Primjeri neravnopravnosti polova najuočljiviji su kada je u pitanju učešće žena u javnom i političkom životu, zatim njihov položaj na tržištu rada koji je karakterističan po

---

<sup>2</sup> Bihać, Bijeljina, Brčko, Breza, Cazin, Čapljina, Doboj, Gacko, Gračanica, Gradačac, Gradiška, Ilijaš, Jablanica, Laktaši, Ljubuški, Maglaj, Modriča, Mostar, Nevesinje, Odžak, Prijedor, Prnjavor, Sanski Most, Srbac, Teslić, Tešanj, Trebinje, Zenica i Žepče

višestrukoj opterećenosti žena u domenu tržišne ekonomije, te povećano nasilje nad ženama, uključujući i nasilje u porodici.

Prema izvještajima Ureda UN Women BiH i državne Agencije za ravnopravnost spolova, napretka u postizanju ravnopravnosti žena u BiH nema, ni u društvenom, ni u političkom životu. Iako žene čine natpolovičnu većinu u BiH (51%), one su i dalje nedovoljno zastupljene u političkom i javnom životu, te se suočavaju sa brojnim problemima i diskriminacijom u pristupu zapošljavanju. Zaposlenost žena u odnosu na muškarce značajno je manja, a žene na istim pozicijama imaju manje plate od muškaraca. Iako je veći procenat visokoobrazovanih žena, one nisu na visokim pozicijama. Unatoč zakonskim propisima kojima se zabranjuje diskriminacija na temelju spola, poslodavci i dalje ne žele zapošljivati mlade žene koje planiraju porodicu i trudnoću, pa žene, skrivaju svoje namjere i trudnoću da bi dobile posao.

Prema podacima Agencije za ravnopravnost spolova u BiH, svaka treća žena je žrtva nasilja, a svaka druga starija od 15 godina doživjela je neki oblik psihičkog, ekonomskog ili fizičkog maltretiranja. Slučajevi femicida izazvali su javne proteste i razotkrili sistemske nedostatke u postupanju kada je u pitanju rodno zasnovano nasilje i nasilje u porodici, kao i nedostatke po pitanju usklađenosti propisa sa Istanbulskom konvencijom. Udruženja žena posebno imaju ključnu ulogu u pružanju podrške najugroženijima, uključujući žrtve nasilja u porodici i rodno zasnovanog nasilja.

Problem položaja žena u BiH u kontekstu ravnopravnosti polova adresiran je i od strane Evropske unije koja je pitanje ravnopravnosti polova prepoznala u okviru 14 prioriteta koje je potrebno ostvariti u procesu pridruživanja Bosne i Hercegovine. Prioritet 9 nalaže institucijama vlasti da jačaju zaštitu prava svih građana, naročito kroz osiguravanje provođenja zakona o nediskriminaciji i ravnopravnosti polova.

*Napomena: Trenutno su kroz PRAGG, na temu unapređenja prava i položaja žena u BiH podržane četiri zagovaračke kampanje koje djeluju kroz strateška partnerstva, kojima se želi:*

- *Dosegnuti kvalitetnija zaštita žena od rodno zasnovanog nasilja u Federaciji BiH kroz izmjenu i dopunu Krivičnog zakona Federacije BiH;*
- *Doprinijeti smanjenju uznemiravanja i diskriminacije žena na radnom mjestu, kroz zagovaranje za donošenje Zakona o zaštiti od uznemiravanja na radu u Federaciji BiH s jedne strane, i zagovaranje za dosljednu provedbu i poštovanje Zakona o zaštiti od uznemiravanja na radu u Republici Srpskoj s druge strane;*
- *Unaprijediti položaj žena i djece žrtava seksualnog nasilja i nasilja u porodici u oblasti zdravstvene i socijalne zaštite u Republici Srpskoj i Brčko distriktu kroz izmjene i dopune Zakona o zdravstvenoj zaštiti i Zakona o socijalnoj zaštiti u Republici Srpskoj i Brčko distriktu;*
- *Doprinijeti kreiranju efikasnijeg sistema zaštite i unapređenja mentalnog zdravlja žena u reproduktivnom dobu, odnosno učiniti zdravstvene ustanove sigurnim mjestima u kojima se pored fizičkog, pažnja posvećuje i mentalnom zdravlju žena u reproduktivnom dobu, prvenstveno mentalnom zdravlju majki, porodilja i trudnica.*



## **II - Prava i položaj marginaliziranih grupa (osobe sa invaliditetom, djeca, djeca sa poteškoćama u razvoju, starije osobe, pripadnici romske populacije i dr.)**

Položaj marginaliziranih grupa u BiH je veoma ugrožen. U Bosni i Hercegovini primjetan je stalni trend porasta stope siromaštva, socijalne isključenosti i društvenih nejednakosti uopšte, tako da prema nekim procjenama u BiH se danas oko 70% građana nalazi u zoni siromaštva. Reakcije predstavnika vlasti kroz kreiranje i implementaciju odgovarajućih politika još uvijek ne daju pravi odgovor na ovaj izazov. Istovremeno, socijalno uključivanje kao koncept osnova je socijalnih politika u zemljama EU, kao i njihove uzajamne koordinacije na nivou EU. Da bi došlo do promjene u kojoj će bh društvo postati više inkluzivno i otvoreno za druge i drugačije nužno je donošenje adekvatnih zakona i njihova primjena kojima će se olakšati pristup zapošljavanju i socijalnoj uključenosti.

**Osobe sa invaliditetom u BiH** spadaju u najsiromašnije i najmarginaliziranije društvene grupe. Prema popisu stanovništva iz 2013. godine, u Bosni i Hercegovini (BiH) od ukupno 3.531.159 stanovnika, 294.058 (8,33%) ima neki stepen invaliditeta. BiH je potpisnica Konvencije UN-a o pravima osoba s invaliditetom prema kojoj države potpisnice prihvataju da su sve osobe jednake pred zakonom i da imaju jednako pravo bez ikakve diskriminacije, kao i jednaku zaštitu i korist na osnovu zakona. To ujedno podrazumijeva izmjenu ili ukidanje postojećih zakona, propisa, običaja i praksi, a koji predstavljaju diskriminaciju osoba s invaliditetom. Prema izvještajima lokalnih i međunarodnih organizacija u domaćem zakonodavstvu postoji neposredna i sistemska diskriminacija utvrđena u mnogim odredbama propisa na svim nivoima, a direktno se odnosi na osobe s invaliditetom po osnovu uzroka/okolnosti nastanka invaliditeta. Zbog loše i neujednačene zakonske regulative, osobe s invaliditetom diskriminišu se i na osnovu teritorijalne pripadnosti. Prava na invalidnine i ostale naknade ostvaruju se temeljem različitih propisa u dva bh. entiteta. Dio politike iz ove oblasti u FBiH u nadležnosti je deset kantona. Primanja se razlikuju, a njihova visina zavisi o uzroku invalidnosti. Najlošiji status imaju osobe sa tzv. neratnim invaliditetom, a riječ je uglavnom o onima koji tjelesna oštećenja ili intelektualne poteškoće imaju od rođenja ili djetinjstva. Generalno, različiti su pojavni oblici diskriminacije osoba sa invaliditetom, a isti se najčešće manifestuju prilikom njihovog zapošljavanja, ostvarivanja prava na zdravstvenu zaštitu, obrazovanja, itd.

*Napomena: Trenutno se u okviru PRAGG projekta na temu unapređenja prava osoba sa invaliditetom provodi projekat sa ciljem uspostavljanja jednakih prava na pomagala za sve slijepce osobe u Federaciji BiH kroz jedinstvenu federalnu listu čija primjena će biti obavezujuća za sve kantone.*

**Djeca sa smetnjama u razvoju** i dalje su jedna od najisključenijih grupa, suočena sa stigmom i diskriminacijom, te neadekvatnim uslugama, posebno u zdravstvu i obrazovanju. Mnogi su i dalje smješteni u zavode, što predstavlja teško kršenje njihovih prava i međunarodnih konvencija. U izvještaju o reviziji učinka Inkluzivno obrazovanje u Federaciji BiH se navodi da u Federaciji BiH ne postoje zvanični podaci o broju djece s poteškoćama i vrsti poteškoća, niti koliko djece s smetnjama u razvoju nije uključeno u procese obrazovanja, dok su politike njihovog uključivanja sporadične. Prema Izvještaju EU o napretku za 2023. godinu jasno je naznačeno BiH treba hitno izraditi i usvojiti strategiju deinstitutionalizacije kako bi krenula ka zbrinjavanju u zajednici. Oba entiteta i Brčko distrikt BiH započeli su izradu vlastitih mapa puta u saradnji sa UNICEF-om.

**Pripadnici romske populacije** predstavljaju najugroženiju manjinu i nalaze se u najnepovoljnijem položaju. Prema Izvještaju ECRI-a o BiH, istraživanjima državnog Ministarstva za ljudska prava i izbjeglice (MLJPI), Institucije ombudsmana za ljudska prava, kao i drugih domaćih i međunarodnih organizacija, evidentno je da je društveno-ekonomski položaj Roma i dalje težak, prvenstveno zbog

visoke stope nezaposlenosti, niskog upisa romske djece u škole i lošeg nivoa obrazovanja odraslih, lošeg stanovanja i infrastrukture, kao i lošeg pristupa zdravstvenoj zaštiti i socijalnim uslugama. Također ukazano je i na činjenicu da je Učešće pripadnika nacionalnih manjina u političkom i javnom životu i dalje na niskom nivou.

**Starije osobe** u BiH prepoznate su kao posebno ranjiva grupacija stanovništva koja je izložena visokom riziku od siromaštva i socijalne isključenosti. Prema posljednjem popisu stanovništva iz 2013. godine udio starijih u populaciji BiH se udvostručio u odnosu na stanje iz 1991. (iz 6,5% u 14,2%),. Ključni problemi sa kojima se susreće starija populacija su niska mjesečna primanja, povećani troškovi života, te povećan rizik od pojave bolesti. Izvori siromaštva su najčešće uzrokovani nedovoljnim izvorima prihoda u odnosu na stvarne potrebe starih osoba. Razlozi niskih prihoda starih osoba su često vezani za njihovu nezaposlenost u predpenzionoj dobi jer poslodavci često traže mlađe osobe za obavljanje redovnih poslova. Još jedan od uzroka nedovoljnih prihoda su i niska primanja u radnom odnosu koja dovode do niskih penzija u starijoj dobi. Generalno, svakodnevni život je posebno težak za stare osobe u ruralnim sredinama razućenog tipa usljed neadekvatne putne infrastrukture, javnog prevoza, trgovina, kulturno-zabavno-sportskih sadržaja i udaljenih ustanova zdravstvene zaštite. U lokalnim zajednicama je uočen nedostatak aktivnosti u kojima bi starija lica mogla uzeti učešće. Iz tog razloga, sposobnosti, vještine i znanja starijih lica ostaju neiskorištena i ona, usljed isključenosti, postaju podložna mentalnim bolestima, a prvenstveno depresiji. Sve to ima negativan učinak na kvalitet života starijih osoba. Kao potpisnica MIPAA i revidirane Europske socijalne povelje (2008), Bosna i Hercegovina je prihvatila da razvije politike, strategije i akcione planove koji će omogućiti zdravo i aktivno starenje svog stanovništva.

### **III - Prava i položaj mladih u BiH**

Različita istraživanja provedena u prethodnim godinama (KULT, UNFPA) pokazala su da oko polovine mladih u BiH u uzrastu od 18 do 29 godina razmišlja o privremenom ili trajnom odlasku u inostranstvo. Ovi trendovi ka spoljnoj migraciji, u kombinaciji sa starenjem stanovništva, rezultiraju brzom depopulacijom BiH. Mladi ljudi ne vjeruju da se javne institucije u BiH brinu o njihovim interesima, a nivo institucionalnog nepovjerenja može dovesti do ravnodušnosti, otpora, te nedostatka volje da se ostvari doprinos političkom i društveno-ekonomskom razvoju. Stoga postoji jaka potreba da se radi na stvaranju povoljnih uslova za život svih članova društva, a posebno mladih. Društveno odgovorni programi orijentisani na mlade mogu postaviti pozitivne primjere i otvoriti mogućnosti mladima da postanu stvarni akteri pozitivnih promjena bh. društva. Rezultati istraživanja ukazuju da se mladi u BiH suočavaju s nezadovoljavajućim standardom i kvalitetom života koji je rezultat nepovoljnih društveno-ekonomskih uslova, visoke stope nezaposlenosti mladih, nedovoljne dostupnosti i/ili pristupačnosti kvalitetnim javnim uslugama, nepodržavajućeg okruženja, kao i nedostatka mogućnosti za lični i profesionalni razvoj. Istovremeno, nivo povjerenja mladih u javne institucije u BiH je prilično nizak što se može objasniti visokim nivoom uočene korupcije i lošeg upravljanja u javnom sektoru.

Istraživanje koje je provela Ambasada Nizozemske u BiH sa mladima, pokazalo je da su glavni problemi koje mladi smatraju prioritetnim za rješavanje, nepotizam i korupcija, odlazak mladih, loše obrazovanje, malo kulturnog sadržaja, jaz obrazovanja i tržišta rada i nezaposlenost. Zapošljavanje je jedan od osnovnih uslova za osiguranje socijalne uključenosti. Svaka četvrta mlada osoba radi na poslovima koji su različiti od njihovog usmjerenja ili formalnog obrazovanja, što uzrokuje značajne nedostatke znanja i vještina potrebnih za obavljanje posla. Aktivne politike zapošljavanja na tržištu radne snage, iako bilježe pozitivan trend, zahtijevaju evaluaciju njihove efikasnosti i održivosti na duži vremenski period. Izazovi sa kojima se većina mladih suočava na lokalnom nivou su neadekvatni kulturni sadržaji, nedostatak prostora za mlade u pojedinim općinama, kao i loša infrastruktura koja otežava putovanje unutar BiH.

Na nivou BiH ne postoji zakon koji reguliše opšta pitanja mladih niti „krovno“ tijelo mladih, niti je napisan i usvojen strateški dokument koji se bavi pitanjima mladih na nivou države. Fokusiranje na mlade BiH istaknuto je i Akcionim planom za realizaciju prioriteta BiH za pristupanje EU koji predviđa mjeru „Hitno provesti aktivne mjere zapošljavanja za rješavanje visoke stope nezaposlenosti, posebno nezaposlenosti mladih, i pružiti efikasnu podršku onima koji traže posao“.

## SMJERNICE ZA KREIRANJE APLIKACIJA

U svrhu kreiranja što kvalitetnijih aplikacija, u nastavku dajemo sumarni pregled smjernica koje potencijalni aplikanti trebaju uzeti u obzir:

- Tematsko strateško partnerstvo koje se bavi problemom koji je adresiran zagovaračkom kampanjom čine najmanje tri OCD koje imaju sjedište u tri različite ciljne lokalne zajednice<sup>3</sup>
- Tematsko strateško partnerstvo može uključivati i više od tri OCD kao i OCD čije je sjedište izvan ciljnih lokalnih zajednica PRAGG projekta, pri čemu u oba slučaja mora biti ispunjen prethodni uslov, a to je da su u strateško partnerstvo uključene i najmanje tri OCD iz tri različite ciljne lokalne zajednice projekta PRAGG.
- Javno-zagovaračke aktivnosti u okviru tematskog strateškog partnerstva mogu se provoditi na području cijele BiH odnosno iste nisu uslovljene ciljnim PRAGG lokalnim zajednicama.
- Fokus zagovaračke kampanje jeste zajednički rad OCD i građana na rješavanju konkretnog problema, unutar jedne od tri prethodno navedene oblasti javnog poziva, za čije rješavanje su odgovorni predstavnici viših nivoa vlasti u BiH (kantonalni, entitetski, državni nivo).
- U zavisnosti od adresiranog problema i nadležnosti različitih nivoa vlasti za njegovo rješavanje, aktivnosti zagovaračke kampanje mogu obuhvatiti jedan nivo vlasti i/ili kombinaciju različitih nivoa vlasti – kantonalni – entitetski – državni.
- Problem na koji se fokusira zagovaračka kampanja mora biti jasno opisan, zašto je to problem građana, šta su njegovi uzroci a šta posljedice po građane. U opisu problema potrebno je identifikovati i navesti ključne donosioce odluka odnosno institucije vlasti nadležne za njegovo rješavanje prema kojima će biti usmjerene zagovaračke aktivnosti. Mora biti jasno naznačeno na koji nivo ili nivoe vlasti će biti usmjerene zagovaračke aktivnosti. Također, izuzetno je važno navesti koji konkretan akt/javna politika i dr. se želi usvojiti i/ili promijeniti kao rezultat zagovaračkih aktivnosti (npr. neki konkretan zakon, podzakonski akt/i i sl.).
- Ciljevi zagovaračke kampanje moraju biti specifični i proizilaziti iz opisa problema, a najmanje jedan od specifičnih ciljeva mora biti formulisan kao konkretan zagovarački cilj.
- Aktivnosti u projektnom prijedlogu trebaju biti podijeljene u najmanje tri grupe, uz uvažavanje sljedećih smjernica:

### **A: Javno-zagovaračka kampanja:**

- Detaljno opisati javno-zagovaračke aktivnosti (npr. definisanje i slanje inicijative, sastanci sa donosiocima odluka, javni događaji sa predstavnicima vlasti i sl.), načine uključivanja građana (ulične akcije sa građanima, peticija, protest ...) i mehanizme konsultacija (javne rasprave, zbor građana, građanska inicijativa ...) sa donosiocima odluka putem kojih će se zagovarati rješenje problema. Detaljno opisati PR aktivnosti kao podršku zagovaračkim aktivnostima kampanje (npr. gostovanja u emisijama, saopštenja za javnost, uspostavljanje društvenih mreža za potrebe kampanje, kreiranje video priloga, radio jinglovi, bilbord kampanja i sl.). Prilikom planiranja PR aktivnosti potrebno je dovesti u vezu željene promjene s intenzitetom ovih aktivnosti odnosno PR aktivnosti moraju biti planirane na način da je na osnovu njihove prirode, sadržaja i kvantiteta nedvosmisleno jasno da će one doprinijeti akutelizaciji predmetnog problema u javnosti, pozivanju na odgovornost nadležnih i na kraju da će doprinijeti ostvarenju ciljeva zagovaračke kampanje.
- S obzirom na to da zagovaračka kampanja mora ostati otvorena i za sve druge OCD i građane koji žele da se uključe u rješavanje definisanog problema, neophodno je

---

<sup>3</sup> Vidjeti spisak JLS u dijelu "Pozadina"

predvidjeti postojanje tematskog čvorišta kampanje (HUB-a) kao online prostora (npr. posebna tematska FB grupa ili neki drugi online alat) i/ili fizičkog prostora (kancelarije OCD-a), putem kojeg će zainteresovani građani i organizacije moći redovno dobijati i razmjenjivati informacije u vezi sa tijekom kampanje, dijeliti resurse i sinergijski djelovati ka rješavanju problema kampanje. Mora biti pojašnjeno na koji način će to tematsko čvorište ispuniti svoju ulogu, kako će građani saznati za njega, na koji način će moći razmjenjivati informacije i sl.

**B: Međusobna saradnja OCD-a i drugih interesnih strana:**

- OCD uključene u zagovaračku kampanju moraju demonstrirati istinsku saradnju i opisati kako će donositi odluke, komunicirati i zajednički djelovati ka rješavanju problema kampanje. U tom smislu, u projektnom prijedlogu aplikanti trebaju predstaviti mehanizme međusobne komunikacije i saradnje, npr. kroz redovne zajedničke online ili offline sastanke, uspostavljanje grupa putem komunikacijskih platformi (npr. Viber, Hangout grupe), radi redovne razmjene informacija i koordinacije aktivnosti. Također potrebno je jasno ukazati na važnost predložene strukture strateškog partnerstva u smislu njihovih individualnih kompetencija, uloga, prethodne međusobne saradnje, ostvarenih rezultata i dr.
- OCD uključene u zagovaračku kampanju, prilikom planiranja kampanje trebaju voditi računa da je predviđeno da redovno prikupljaju sve relevantne informacije, dostupne analize i istraživanja, medijske objave i sl., te ih objavljuju putem društvenih mreža i na zajedničkoj platformi [www.pragg.ba](http://www.pragg.ba), kako bi i šira javnost, druge zainteresovane OCD i pojedinci imali mogućnost da dobiju sve informacije o kampanji i pridruže se zajedničkim naporima postojećih članica strateškog partnerstva.
- Kako bi dobili različite perspektive u vezi sa mogućim pravcima rješavanja problema, neophodno je predvidjeti saradnju sa ekspertima, praktičarima, profesorima, privrednicima, medijskim radnicima i drugima koji imaju relevantna iskustva iz oblasti kojom se bavi zagovaračka kampanja (s tim u vezi, u toku trajanja zagovaračke kampanje članovima strateških partnerstava biće osigurano učešće na najmanje dva grupna tematska sastanka i sl. kako bi unaprijedili svoja saznanja i razmijenili informacije značajne za rješavanje adresiranih problema. Sama organizacija i trošak organizacije ovih sastanaka biće pokrivne od strane PRAGG projekta).

**C: Jačanje kapaciteta:**

- Podnositelj aplikacije, odnosno OCD nosilac projekta treba predvidjeti da će u slučaju odobrenja aplikacije, na početku implementacije projekta sudjelovati u programu samoprocjene i procjene organizacijskih kapaciteta u skladu s KULT/POK® metodologijom, a koji će provoditi Institut za razvoj mladih KULT. Po završetku procjene, OCD će dobiti mentorsku i savjetodavnu podršku u provedbi smjernica za poboljšanje interne strukture i eksternih procesa. Sve članice zagovaračke kampanje, na raspolaganju će imati druge elemente važne za jačanje ljudskih i organizacijskih kapaciteta OCD, a koji će se naknadno usaglasiti po odobrenju projektne aplikacije.

Kroz ovaj javni poziv neće biti podržane aplikacije koje:

- se fokusiraju na probleme koji nisu povezani sa tri definisane oblasti javnog poziva;
- u prvi plan stavljaju generalna istraživanja i anketiranja javnosti u vezi sa oblastima javnog poziva, bez zagovaračkih aktivnosti koje će voditi rješavanju nekog konkretnog problema. Naime, brojna istraživanja u ovim oblastima su već urađena i nema svrhe ponavljati ih, osim ako nisu striktno vezana za rješavanje nekog specifičnog problema i nisu ranije provedena.
- u prvi plan stavljaju aktivnosti edukacija ili informisanja javnosti, umjesto da se fokusiraju na zagovaračke aktivnosti i obezbijede dobijanje podrške korisničke grupe na rješavanju konkretnih problema.

## USLOVI I PROCEDURE ZA APLICIRANJE

Maksimalna vrijednost budžeta u projektnom prijedlogu **ne smije prelaziti 50.000 BAM**. Vremensko trajanje projekta mora se kretati u rasponu **od minimalno 12 do maksimalno 18 mjeseci**.

Pravo učešća na ovom javnom pozivu imaju pravna lica registrovana prema važećim zakonima o udruženjima i fondacijama u BiH, a koja imaju jedan od sljedećih pravnih statusa:

- Udruženje;
- Fondacija.

Pojedinci, političke stranke, OCD povezane sa političkim strankama, međunarodne i strane organizacije, vladine institucije te vjerske zajednice nemaju pravo učešća na ovom javnom pozivu.

U svaki projektni prijedlog, zagovaračku kampanju, moraju biti uključene najmanje tri OCD iz najmanje tri različite ciljne lokalne zajednice projekta PRAGG<sup>4</sup>. Dozvoljeno je da na ovaj javni poziv apliciraju i organizacije sa sjedištem izvan ciljnih lokalnih zajednica, pod uslovom da zagovaračka kampanja uključuje najmanje tri OCD-a iz tri različite ciljne lokalne zajednice projekta PRAGG.

Aplikant može aplicirati kao nosilac projekta sa maksimalno dvije aplikacije, s tim da istom aplikantu može biti odobrena samo jedna aplikacija.

Jedna OCD može biti partnerska na više aplikacija i dobiti podršku kroz više odobrenih projekata.

Aplikacije i prateća dokumentacija (u elektronskoj formi) dostavljaju se isključivo putem e-mail adrese: [grantovi@pragg.ba](mailto:grantovi@pragg.ba).

### Obavezna aplikaciona dokumentacija:

- Aplikacioni obrazac u elektronskoj formi (Word ili PDF dokument);
- Izvod iz registra udruženja/ Rješenje o registraciji u elektronskoj formi (skeniran dokument) - za aplikanta i za partnerske OCD;
- ID Broj/ Rješenje o registraciji u poreskoj upravi u elektronskoj formi (skeniran dokument) – za aplikanta i za partnerske OCD;
- Finansijski izvještaj za posljednju fiskalnu godinu u elektronskoj formi (skeniran dokument) – za aplikanta;
- Skenirane potpisane izjave o partnerstvu za sve partnerske organizacije.

Aplikacija i prateća dokumentacija moraju biti napisane na jednom od službenih jezika i pisama BiH.

Nepotpune aplikacije, prijave na neodgovarajućim obrascima, kao i aplikacije koje nisu pristigle na zvaničnu e-mail adresu, neće biti uzete u razmatranje.

Kroz aplikacioni obrazac, aplikant mora jasno demonstrirati da posjeduje iskustvo u tematskoj oblasti na koju aplicira, kao i kapacitet da upravlja kampanjom usmjerenom ka višim nivoima vlasti u BiH

---

<sup>4</sup> Bihać, Bijeljina, Brčko, Breza, Cazin, Čapljina, Dobojo, Gacko, Gračanica, Gradačac, Gradiška, Ilijaš, Jablanica, Laktaši, Ljubuški, Maglaj, Modriča, Mostar, Nevesinje, Odžak, Prijedor, Prnjavor, Sanski Most, Srbac, Teslić, Tešanj, Trebinje, Zenica i Žepče

(kantonalni, entitetski, državni), te organizacionu sposobnost da rukovodi tematskim čvorištem kampanje (HUB).

U slučaju odobrenja aplikacije, CCI će zaključiti Grant ugovor isključivo sa aplikantom, a ne sa partnerskim OCD. Sastavni dio ugovora čini i Kodeks PRAGG projekta, koji će aplikanti biti u obavezi da potpišu.

Tokom implementacije projekata, aplikant će biti odgovoran za upravljanje programskim i finansijskim segmentom projekta, kao i za izvještavanje prema CCI.

<b>VREMENSKI OKVIR ZA APLICIRANJE, VREDNOVANJE I ODOBRAVANJE APLIKACIJA</b>
---

Javni poziv je otvoren od dana objavljivanja do 01.11.2024. godine do 16:00 sati.

Aplikacije pristigle nakon navedenog roka neće biti uzete u razmatranje.

Dinamika apliciranja i rokovi pojedinih faza vrednovanja i odobravanja aplikacija prikazani su u tabeli ispod. Navedeni datumi su okvirni i projekat PRAGG zadržava pravo na odstupanja u planiranoj dinamici.

<b>Aktivnost</b>	<b>Okvirni rok</b>
Objavljivanje javnog poziva	02.10.2024.
Prezentacije javnog poziva	16-18.10.2024.
Rok za pitanja u vezi javnog poziva	21.10.2024.
Objavljivanje odgovora na pristigla pitanja	23.10.2024.
Rok za dostavu aplikacija	01.11.2024.
Obavještanje aplikanata o rezultatima vrednovanja aplikacija	31.12.2024.
Potpisivanje ugovora sa uspješnim Aplikantima/Organizacija kick off događaja	15.01.2025.
Početak implementacije projekata	15.01.2025.

Ukupna vrijednost planiranih sredstava za dodjelu kroz ovaj javni poziv iznosi 250.000 BAM.

Iako je namjera da se podrže najbolje rangirane aplikacije u sve tri navedene oblasti javnog poziva, u slučaju prijema nedovoljnog broja ili nedovoljno kvalitetnih aplikacija, PRAGG zadržava pravo da ne dodijeli sva raspoloživa sredstva, da u nekim oblastima podrži više aplikacija ili da ne dodjeli Grant podršku u svim oblastima javnog poziva.



**KRITERIJI ZA VREDNOVANJE APLIKACIJA**

Kako bi obezbijedili potpunu objektivnost i nepristrasnost tokom procesa vrednovanja i odobravanja aplikacija, sve pristigle aplikacije biti će vrednovane od strane Grant odbora, te od strane Validacijskog odbora, na bazi sljedećih kriterija:

<b>Značaj projektnog prijedloga i njegov doprinos ciljevima PRAGG projekta (max. 40 bodova)</b>	Aplikacijom je uspostavljena jasna veza između identifikovanog problema i viših nivoa vlasti u BiH (kantonalni, entitetski, državni)	10
	Aplikacijom su predviđene specifične aktivnosti propisane pozivom, kao i aktivnosti podizanja kapaciteta	10
	Predloženi pristup uključuje angažman OCD-a i/ili drugih aktera civilnog društva (mediji, akademska zajednica, stručna javnost, poslovna zajednica ....) iz PRAGG ciljnih opština/općina/ gradova	10
	Razlozi učešća i kompetencije partnerskih organizacija jasno i logično povezani sa projektom	5
	Aplikacijom su uzete u obzir potrebe socijalno isključenih grupa, žena i mladih	5
<b>Relevantnost projekta (max. 35 bodova)</b>	Adresirani problem je dobro istražen i pojašnjen, ciljne grupe i korisnici su jasno definisani	10
	Opšti cilj i specifični ciljevi odgovaraju na identifikovani problem i realno su dostižni.	5
	Aktivnosti su jasno predstavljene, slijede projektnu logiku i zahtjeve Javnog poziva	5
	Očekivani rezultati su jasno postavljeni i sadrže specifične indikatore promjene i uticaja, koje je moguće dokazati/ verifikovati	5
	Aplikacija sadrži komponentu komunikacije sa javnošću kako bi isporučili zacrtane ciljeve	5
	Ciljne grupe će imati dugoročnu korist od efekata provedenog projekta	5
<b>Organizacioni i upravljački kapaciteti aplikanta (max. 15 bodova)</b>	Aplikant posjeduje iskustvo u upravljanju sličnim projektima	5
	Aplikant posjeduje iskustvo i organizacione kapacitete da rukovodi umrežavanjem OCD-a	5
	Aplikant posjeduje upravljačke kapacitete (osoblje, opremu i sposobnost da upravlja projektnim sredstvima)	5
<b>Racionalnost budžeta i troškova (max. 10 bodova)</b>	Postoji jasna veza između planiranih aktivnosti, resursa, očekivanih rezultata i planiranih projektnih troškova. Pojedinačne stavke u Budžetu su realno procijenjene i izbjegnuto je nepotrebno trošenje sredstava	10
<b>UKUPNO</b>		<b>100</b>

## TROŠKOVI PROJEKTA I BUDŽET

Ukupan iznos troškova po aplikaciji ne smije prelaziti 50.000 BAM.

Svi planirani troškovi moraju biti realni i povezivi sa aktivnostima koje su predložene u projektnom prijedlogu i biti izraženi u konvertibilnim markama (BAM).

Osim tabelarnog prikaza budžeta za aplikanta, u istoj budžetskoj formi potrebno je predstaviti i troškove partnera (ukoliko su planirani njihovi troškovi), te dostaviti narativni dio budžeta koji detaljno obrazlaže troškove potrebne za implementaciju projekta i iz koga je jasno vidljiva veza budžeta sa obimom planiranih aktivnosti. Narativni dio budžeta mora objasniti sve troškove i osnovicu za izračunavanje troškova koji su sadržani u budžetu.

Svi planirani troškovi realizacije projekta trebaju biti iskazani bez PDV-a. **Trošak PDV-a nije prihvatljiv.** Aplikanti koji budu podržani kroz PRAGG projekat naknadno će dobiti pojašnjenja u vezi procedure povrata PDV-a.

### *Prihvatljivi troškovi*

**1. Plate i doprinosi** - uključuju naknadu troškova rada zaposlenika koji redovno rade na projektu. Budžet treba pokazati pozicije osoba i sadržavati informaciju da li su zaposlenici angažovani na projektu na puno radno vrijeme ili parcijalno. Ukoliko se radi o parcijalnom angažmanu, treba navesti procenat radnog vremena koji je obuhvaćen platom. Ova stavka ne treba uključivati konsultantske honorare, privremene i povremene usluge osoblja i sve druge vrste usluga koje spadaju u projektne aktivnosti.

**2. Zakup i komunalne usluge** - uključuje troškove za plaćanje zakupa kancelarije i troškove za komunalne usluge. Iznos troška za zakup i komunalne usluge treba biti odvojeno prikazan.

**3. Kancelarijski materijal** – uključuje kupovinu kancelarijskog materijala, kao što su: papir, olovke, fascikle, toner za printer i kopir aparat, te drugi materijal potreban za svakodnevnu upotrebu.

**4. Oprema** – uključuje kupovinu opreme koja treba biti upotrijebljena za vrijeme implementacije projekta, maksimalno do 10% od ukupne vrijednosti projekta. Svaki dio opreme treba biti naveden odvojeno i treba biti navedena cijena po jedinici.

**5. Komunikacije i poštarina** – troškovi komunikacije uključuju troškove za telefon, fax, e-mail, i internet, zakupa domena/servera .... Poštarina uključuje troškove poštanskih markica i usluge ekspresne dostave.

**6. Putni troškovi** – ova kategorija podrazumijeva troškove prevoza za lokalna putovanja, smještaj i dnevnice koji su napravljeni na službenom putu a koji su u vezi sa projektom.

**7. Ugovorne usluge** – uključuju usluge koje su obezbijeđene na ugovaračkoj osnovi, uključujući: konsultantske naknade, privremene i povremene poslove, usluge prevođenja, iznajmljivanja opreme, usluge revizije, pravne usluge, usluge računovodstva (ukoliko se izvodi od strane nekog vanjskog ugovarača koji nije zaposlen unutar organizacije).

**8. Drugi direktni troškovi** – podrazumijevaju sve direktne troškove koji nisu navedeni, kao što su troškovi javnih događaja – sastanaka, konferencija i sl., izrade promotivnih materijala, medijske promocije, iznajmljivanje opreme, bankovne provizije itd.

***Neprihvatljivi troškovi***

- a) Troškovi koji se odnose na aktivnosti koje nisu u vezi sa odobrenim prijedlogom projekta ili ne doprinose realizaciji istog;
- b) Dugovi i kamate;
- c) Kupovina zemljišta i zgrada;
- d) Zajmovi, pokloni, priznanja, kazne;
- e) Ostali neopravdani troškovi.

## IZJAVA O PARTNERSTVU

***Izjava o partnerstvu treba biti potpisana i dostavljena uz aplikaciju i odnosi se na sve partnerske organizacije uključene u zagovaračku kampanju***

Svojim potpisom potvrđujemo sljedeće:

- Upoznati smo sa aplikacijom koju podnosi aplikant i razumjeli smo svoju ulogu, kao članice strateškog partnerstva.
- Saglasni smo da (naziv OCD koja je aplikant) bude nosilac zagovaračke kampanje na projektu PRAGG, te da u slučaju odobrenja aplikacije, upravlja projektom, potpiše ugovor sa CCI, kao i eventualne naknadne anekse ugovora.
- Svojim kapacitetima (ljudskim i materijalnim) možemo obezbjediti uspješno sprovođenje dijela aktivnosti u koje smo uključeni, u skladu sa projektnim prijedlogom.
- U slučaju zaključivanja Grant ugovora između CCI i aplikanta, preuzimamo obaveze planiranja i izvještavanja u programskom i finansijskom segmentu projekta prema aplikantu, a omogućićemo i superviziju programskih aktivnosti, kao i finansijskog poslovanja, u vezi sa odobrenom aplikacijom u okviru projekta PRAGG.
- Izražavamo interes da budemo dio procesa jačanja kapaciteta podržanih organizacija civilnog društva u okviru projekta PRAGG.

Partnersko udruženje/ fondacija:	
Odgovorna osoba:	
Pozicija:	
Potpis:	
Datum, mjesto, pečat:	